




列女傳卷十五

一


仇英實甫繪圖



087053

韓太初妻

列女傳卷十五




韓太初妻劉氏真定新樂縣人太初仕元爲顯官洪武
七年家徙和州劉氏奉養姑甯至南宮縣姑仆地傷其
腰劉氏籲天刺臂血和湯以進遂愈至瓜洲姑復病再
進再愈至和州鬻蔬以供養無遺禮又二年姑患風疾
不能起時盛暑劉氏晝夜驅蠅蚊不息蛆生枕席齧其
蛆蛆不復生姑病隨愈後除夕姑忽病危醫劉氏小指
意與之永訣劉氏不悟明旦斬指滴血和粥以進姑病
旬復愈逾越月而卒劉氏遵遺命殯之淺土俟歸葬舊
塋五年而弗果哀號常如袒括之日事聞朝廷召至京

厚賜之官送甯氏喪歸葬新樂旌門復其役

列女傳卷十五

三





山陰潘氏

山陰徐允讓妻潘氏元至正己亥春允讓從父安避兵山谷間遇官兵至斫安頸流血允讓大呼曰汝寧殺我勿殺吾父兵卽舍安而殺允讓將辱潘潘給曰我夫旣死從汝必矣若能焚吾夫則從汝無憾也兵信之聽潘聚薪焚其夫因自投烈焰而死國初事上聞禮部議曰允讓能捐軀以全父生潘氏隕命以全婦道孝節竝著實人所難詔旌表爲孝節之門



列女傳卷十五

五

胡亨華妻


國朝婺源胡亨華妻方氏名細章同邑方浩之女也嫁
未幾亨華卒方氏頓絕而蘇者三衣衾棺槨悉以奩具
爲之卜葬于齊源囑工爲虛壙于右以待自歸去脂粉
不爲容飾孝事其姑一日告于夫墓曰吾事畢矣遂歸
家自經而卒戶部主事汪敬以詩哀之云生不半年同
枕席死期一塚共丘山君子謂方氏爲貞烈詩云死則
同穴此之謂也

汪 曰岬城爲紫陽桑梓忠孝節義不乏于時而
有傳有不傳則其所遭者異也茲復如前之以好名




爲諱則不傳者固終於不傳其曾傳者亦淪於烏有
之鄉不復可認識矣方氏之事視古烈女亦何愧焉
而寥寥斯世未有能識之者則其所遭之不幸而弗
得人以表章之也乃信孤節獨行非附青雲之士固
弗能聲施後世也已





高氏五節

國朝光州固始高氏有五節婦高希鳳妻劉氏希鳳在遼東爲亂軍所掠而不伏虞怒斷其腕而死劉氏亦被虜行十餘里罵不絕口爲所殺希鳳仲弟藥師奴妻李氏早寡因亂携子姪往避難高麗國初同子姪來歸居應天府守夫墓誓不再適希鳳季弟伯顏不花爲納哈出所殺其妻郭氏自縊于馬樞希鳳從子高塔失丁爲父讐陷而死其妻金氏與姑邢氏俱自縊于一室一門義不受辱事聞詔旌表之



列女傳卷十五

栾城甄氏

栾城李大妻甄氏孝於舅姑夫與其弟異居姑一日出
往次子家甄氏隨侍不忍去姑命之還甫三日甄氏忽
心動舉身流汗少頃果有來告其姑病篤者甄氏沿道
拜禱往至姑側侍疾數日而愈後姑年九十一以疾卒
合塋于舅墓甄氏廬于墓側三年旦夕悲慟不輟里人
稱爲孝婦洪武中詔旌表其門

汪

曰人子慕親自少而長且不能無遷於異物

矧婦之於姑能望其有終身慕乎甄孝婦不忍舍姑

無異人子之在膝下姑疾而心動又與母鬻指而子



心動者無以異也沿塗拜禱又與稽顙北辰求以身
代者無以異也合葬廬墓不減孝子之誠亦可謂生
事盡慕死事盡思者矣古以終身慕爲大孝愚於甄
氏婦亦云

列女傳卷十五

世





張友妻

國朝歛張友妻洪氏之女也友久患陰潰洪氏竭力調養不以爲穢以口舐之友卒旣葬洪預結塋誓同穴辛勤養姑姑憐其早寡無子欲奪其志洪不聽後邑富者求爲配族人與姑陰納聘至期逼嫁洪祥語曰嫁不辭當與夫別乃具酒饌造夫墓慟哭而歸請姑從容告別入室閉門自縊死士大夫咸傷悼作詩歌挽之姑亦繼亡家爲故墟君子謂洪氏志不可奪禮云一與之醮終身不改此之謂也


汪 曰木有連理鳥有比翼植飛之物無情猶若

有情別人平生同衾而死同穴匹婦之志有必不可
奪者不可奪而欲奪之此所以成其節烈也又所以
顯其節烈也若洪氏之事是已郡中節烈婦真可連
車載焉欲歷歷表之剖劓且告勞矣特章一二俾不
盡屬湮滅之鄉云



旣寧江氏

國朝建寧旣寧縣徐鏐妻江氏事舅姑甚謹天順間從夫遊宦遇劫夫被執江抱幼子漢方三歲越墻走二賊追之江給曰吾有金瘞卧房汝不速取爲他人有二賊捨江而去江疾抱漢踰垣將漢寄鄰家登樓矯語夫曰房內西畔屋柱下金存否賊聞之競索金遂與其夫得脫任滿歸鄉里勉夫促裝之京遭舅故子幼脫釵釧爲衣衾棺槨之類夫服闋復偕江氏至都下改除上海縣簿卒于京江携男漢濱洪扶柩歸葬舅墓側一日屬其衆子曰吾事畢矣汝等善相保護遂自經墓旁時人哀



之


汪 曰天下事有經有權權也者稱物輕重而往來以取中者也膠固而不通執泥而不變則不得謂之權故道在於誠實欺詐非道也而欺詐以免盜不害爲能權道在於死節苟活非道也而苟活以撫孤不害爲能權如必以死爲貞矯激輕生之婦將奔走焉其於中道詎得無刺繆哉願權非聖人不能用可與立者尚未可與權也又何望於婦人女子是宜江氏於此偶合於遇盜之日而卒倚着於自經之時蓋夫雖死有子可從則道在於守夫之子可以無死而

死安所稱權然而不害爲女婦之懿軌矣

列女傳卷十五

十六





方氏細容

國朝方氏細容歛呈坎羅中正之妻也年十七歸中正時曾王姑暨王姑尚在堂老病不能舉止方氏供糜粥給藥餌靡敢怠迨二姑相繼以天年終則傾奩橐佐喪事以紓姑急姑故孱弱弗任勞二叔呱呱戀襁祗方氏悉孩之代姑撫育如已出居無何中正客死湖陰計聞方氏勺水不入口慟絕者屢誓以櫬歸必相從地下越七日家人奉柩歸窆封樹之方氏仰天飲恨曰吾事畢矣客向舅姑寢所拜稽辭謝遂以是夕引繩自經適爲女娘所覺急救之家人悉起取水灌之既絕而甦舅姑


前泣謂方氏曰兒無祿誤新婦幸有藐孤願新婦勉稱未亡人存兒如綫之脉新婦必欲捐生從兒吾白頭者巨暮填溝無所憾睠茲黃口子焉誰恃而能獨生我二人何復戡此憂請先新婦死因命家人嚴守婦方氏求死不得弗獲已遂一意養舅姑強食哺子願家日就窘方氏朝刺繡夜績麻以給二人甘旨及歿喪葬盡禮毫無怨吝當道上其事表爲節孝婦君子謂方氏能不爲矯激之行有合乎女道之中傳云慷慨赴死易從容就義難此之謂也

汪 曰婦身殉夫有可以死之道有可以無死之

道故道在於死則求生爲害仁而道在於無死則敢死爲傷勇此惟知道之君子能決擇焉乃方氏見及斯矣方氏產名門歸望族內教所漸宜非一日故能審處婦道之中彼誠知一死則責塞而名隨且死易立孤難也然而重傷舅姑之心終缺舅姑之養則所尤重又不在于徒死矣夫且故隱忍圖存以執執之荆布當數十年之荼蓼途往事居艱苦萬狀甘心於其所難可不謂賢矣哉郡中固多節孝婦茲其傑然者矣特蒐列之俾得與古幽媛孤嫠竝垂不朽

列女傳卷十五

十九





列女傳卷十五


姚少師姊


少師姊者太子少師姚廣孝之姊也性端嚴不喜音樂
裸劇人有過輒面責之不少貸焉廣孝初爲僧姊嘗戒
之曰汝旣爲和尚當發慈悲心蓋知其心之好殺也及
廣孝預靖難王師威武奮揚渡江後諸大臣不免誅夷
之慘姊聞之嘆息謂人曰和尚慈悲當如是耶後廣孝
進爵太子少師承命往賑蘇湖等郡遂還吳往見姊姊
拒之曰貴人何用至貧家爲不納廣孝乃易僧服往姊
堅不肯出家人勸之姊不得已出立堂中廣孝卽連下

拜姊曰我安用爾拜許多耶曾見做和尚不了底是甚

好人言畢遂還戶內不復再見君子謂姚少師姊之賢而正不役志於富貴焉詩云匪面命之言提其耳此之謂也

汪 曰昔聶政之姊以死顯弟之名梁公之姊以身顯弟之失今姚廣孝之姊亦能直言以正其弟之非三氏姊皆有聲於時有聞於後姚與狄志行略符猶賢於聶且見其浮雲不義之富貴前與癡姨同也至世宗時追上文皇祖號而罷斥姚廣孝從祀使祀大興隆寺殊快人心則知廣孝當日之事其不滿於人心者卽其不愜夫姊意者也






解大紳女

解大紳之女翰林周是脩之子婦也建文之難周是脩與楊士奇解縉約同死節已而士奇縉背約獨周是脩死之其子以父死事編成縉因欲離昏女弗從自幽一室中塞其窻戶止留一隙竇可通食飲日獨危坐不事妝飾洪熙元年盡釋建文忠臣之家屬是脩之子乃得放還女始出完聚君子謂解氏女能全節義孟子云父不得而子此之謂也

汪 曰忠臣不事二君烈女不更二夫二君之事

在縉則可二夫之更在其女則不可此賢不肖之大


較也謫才曷稱焉周翰林縱過於忠一死可塞妻孥
遠戍豈其罪也縉不知爲救而欲絕昏或亦無顏承
斯姻眷耳身旣負約復欲其女之渝盟所謂不能行
於妻子者令得以父而奪諸其子性善之言爲無驗
矣惟其不然此解氏之名宜與裴氏淑英共敝天壤
也



解禎亮妻

列女傳卷十五


二十四




禎亮妻者狀元胡廣之女解縉之子解禎亮之妻也永樂初縉廣侍燕於文淵閣文皇曰縉廣少同業仕同官今縉既有子廣宜妻之以女廣俯首曰臣妻有娠然未卜男女文皇曰定生女勿疑矣越數月廣妻果生女遂訂盟既而縉遭讒死舉家戍邊女未及歸而禎亮已戌行矣逾數年父母欲令女改適女厲聲曰薄命之婚皇上主之父面承之一與之盟終身不改背主違父何用生爲遂竊入室以刀截耳及家人覺之而往救已血被兩頰異議遂寢逮仁廟時禎亮舉家召還女乃歸解氏

事姑徐氏猶極孝謹云君子謂禎亮之妻得從一而終之義詩云我心匪石不可展也此之謂也

汪 曰縉廣學同業仕同官而同一心術同一節行又同有是貞女也奇矣哉漢王良負盛名而茲時復有王良能死節漢胡廣號中庸而茲時復有胡廣如合契又大奇矣哉縉之不齒於士論也視廣尤甚既自有愧於其女益復有愧於子婦死者如有知也其何顏而享斯蘋藻也





節孝范氏

汪 曰婦之於夫能死非難善處死爲難故孝不滅性節不苦貞乃爲契乎大中之致藉必斷脰決腹一瞑以爲快此奇詭之行卽皎皎有聞而以槩諸中庸無當也余嘉范氏婦睹節孝之行事可術焉

節孝范氏蕪湖人年十八歸海陽汪世衡世衡字仕齊號倚南慷慨慕義人也賈湖陰食客門下百餘人范居中贊畫曲折靡弗中機宜仕齊甚任之然善諭諷守正不阿每仕齊督過諸從事輒從中察當否可言諫者以微辭諷罷之否則潛以愉色施易之仕齊以斯益重焉


仕齊室程氏未有所出旋納左氏姬舉二子

已又就湖陰納范生二女左氏蚤逝范視二子若已出二子亦陶仁浸義恂恂無間言不自知爲左出也仕齊病湖陰范日夜侍湯藥不交睫者三月病益劇仕齊張目視范脫有不諱是無柰若何范跪而嗚咽謂婦從夫也妾何難以巾櫛侍夜臺第願徼天之靈輸妾年以禪主遂齋戒晨夕焚香籲天與其速奪主也無寧速奪妾乃潛割股以進病果痊仕齊爰擇宗兄之子廷謚後范居闕五月無恙也旣而歸省復如湖陰則病大作范迭更醫不効擗踊絕粒蒲伏牀前請歸一謁程蚤得相

從地下仕齊戒勿行曰若今非可以死若獨弗念曩所爲立後意乎且吾業由湖陰起卽歸骨海陽魂魄猶時之湖陰也若第爲位哭歲時朔望弗忘尸祝則若無子而有子吾雖歸猶未歸願適矣必欲相從吾視且弗可舍也范感其言而止君子謂范於是乎知所處

國馬氏曰仕齊公生平勇於爲義急人之阨濟人之窮揜骼瘞背建梁造路善行未易縷指王衛輝狀之爲詳其得正而斃也近屬有惜公者謂公仁心愿質千里頌義而曾弗躋中壽天之報施善人顧若爾耶公瞿然曰不佞無善可稱抑患善未至也人生五十已弗言歿或不

且不當得而得此於分侈矣天之眷命懋矣願諸君益勵於善慎毋鑑不佞而自沮也味其言其於心行善淫天人禍福之際見之審矣愚用是謂公之喜讀書習典故夫人能也矚都會徵貴賤夫人能也部署有方籌畫中度夫人能也至惇倫樂義惟修德爲兢兢孝恭一節始終無間父諒其誠兄服其義子蒸其化茲其人豈庸庸碌碌富都那豎能延跂而詣其外藩焉者是宜范氏於斯親炙頽化請代於前受遺於後以順爲正而以中爲歸節孝兩足嘉焉不激不隨范於是乎加人一等矣





王素娥

國朝王素娥號蘖屏山陰王真翁女也生有淑德長能
詩文尤曲盡女工年十七歸胡節節以吏曹死北畿素
娥誓不他適年四十一卒嘗有黃昏詩云堦下蛩吟又
暮秋倚欄獨立恨悠悠幾多心事三年淚忍向更深枕
上流君子謂素娥能全其節易云安節亨此之謂也

汪

曰蘖有清苦之味人以清苦自持則謂其有

水蘖聲顧不堪此苦者則唾棄之不暇而苟甘此苦
者則慕悅之不勝亦人之志趣何如耳王素娥以蘖
自號識其清苦之是甘矣信其淑德之固有矣其憫

於詩文也無足多也其精於女紅也無足多也至其
守茲清苦不慕華腴視彼目招心挑之婦望富厚而
奔者不以筵楹判乎哉

列女傳卷十五


三十



程鑑之妻

列女傳卷十五

三十一



休寧富溪程鑑之妻竹林汪氏之女也年十七歸鑑事翁姑至孝姑嘗病幾殆鑑惶懼焚香祝天求以身代汪曰汝惡能代母惟婦可以代姑耳是夜刲股作糜以進病尋愈鄉間亟稱其孝鑑嘗閱卷嘆曰賢哉婦也汪問此何書鑑曰此吾門所紀節婦行蹟也汪曰婦人執節常事耳奚足爲異隣有孀婦改適者鑑歸語汪曰某今以爲某人婦矣汪曰婦人不幸遭此有子者當忍死以撫孤無子者當速死以招從而甘于改嫁禽獸行也鑑曰是殆有難能耳居逾二年鑑商遊松江溺水死汪聞

計慟絕而甦者數四既而哽咽泣謝翁姑曰夫既不幸妾何能獨生今當踵入冥路求與俱矣舉家驚懼嚴守之汪乃詐言夫襯未至吾猶未卽死也防之少懈卽自經而死遠近嗟惜之君子謂程妻貞而固詩云無言不酬無德不報此之謂也


汪 曰春風噓桃李乃松栢不爲歲寒改柯何者其貞堅素定也我顯祖唐越國公起于績之登源而梁程忠壯公實留歛之篁墩故郡中有十姓九汪之諺程亦不亞汪焉汪程之衆幾半吾郡故傳所紀錄二氏爲多程鑑之妻吾宗女也從一不二其志先定

故視執節爲常事以改適爲獸行則當其平居情見乎詞其所病乎人者必弗蹈於已矣卒以夫亡與亡慷慨赴死不忘平生之言乃信昔所談許非苟言之實允蹈之者也

列女傳卷十五

三十三






鄒賽貞

國朝鄒賽貞者濮未軒公之配費鸞湖之岳母也號士齋封孺人少聰慧博覽子史以含咀其菁華隨事摹寫和平莊重見者莫不奇之春日述懷詩云遲遲日影上簾鈎百種新愁掛念頭午睡易驚鄉夢遠春輝難報寸心柔薰窻燈火常當夕鵬鷺風雲未遇秋身病消容尤可恨菱花照處自堪羞京邸九日懷未軒詩云十年清苦伴青氈喬擢無緣別思牽楓葉蕭蕭添曉醉菊花朶朶鬪寒妍秋江未見歸張翰孤館誰憐老鄭虔欲覓白衣克酒使遠傳逸興到籬邊君子羨鄒賽貞之才詩云

豈不懷歸此之謂也

汪 曰唐世女婦類能詩今則以筆墨匪閨闈事
知書者且不槩見矧詩賦乎此雖以女德之所不載
習尚致然亦其資性殊也鄒賽貞獨能是是足稱於
世而列於辨通之林矣天生俊英愚婦固難捧心效
顰而企其涯涘也




韓文炳妻

列女傳卷十五

三十六

國朝縣縣韓文炳妻汪氏年二十二而寡事姑孝嘗刲
股以療其疾弘治間奏聞旌表君子謂韓氏婦能以青
年勵節而其孝尤足多焉可以風矣易云介如石此之
謂也



列女傳卷十五

三十七






台州潘氏

國朝浙江台州潘氏山東督學潘留鶴之女貢士裘西
川之妻也善吟咏君子謂其有幽閑淑女之風非特婦
人之能言當不在謝希孟之下哭夫云不幸我夫殞帝
州扶棺千里豈勝愁只知誦讀頻勞力誰料功名未到
頭父母恩深安得報夫妻情重幾時休西川面目何由
見腸斷西風血淚流君子謂潘氏以高才而值奇數孟
子云莫非命也順受其正此之謂也

列女傳卷十五

三九





葉節婦

國朝葉節婦海陽李功甫敏女也幼閑父教兼通史籍
年十七歸葉長君滄葉好儒李佐以儒術踰年葉寢疾
李躬藥爇脩累月不交睫疾轉劇李時已妊葉謂李命
之脩短天也若將何以事我李拊膺悲號婦人之職從
一而終願相從地下以事君則叩天自誓葉曰不然吾
二人在堂承懽之托辱在於汝且幸有遺腹若男也則
撫諸孤以奉禋祀吾猶有不亡者存雖不相從地下吾
寧矣



程文矩妻

漢中程文矩妻者同郡李法之姊也字穆姜有二男而前妻四子文矩爲安衆令喪於官四子以母非所生憎毀日積而穆姜慈愛溫仁撫字益隆衣食資供皆兼倍所生或謂母曰四子不孝甚矣何不別居以遠之對曰吾方以義相導使其自遷善也及前妻長子興遇疾困篤母惻隱自然親調藥膳恩情篤密興疾久乃瘳於是呼三弟謂曰繼母慈仁出自天受吾兄弟不識恩養禽獸其心雖母道益隆我曹過惡亦已深矣遂將三弟詣

南鄭獄陳母之德

列女傳卷十五





俞氏雙節

上海任仕中妻俞氏字淑安年二十一而寡女甫二歲一男生五月姑先夫卒舅仕遠方家貧無依親戚咸勸之再適俞氏斷髮自誓復強之俞氏欲自剄衆懼而止紡織績紝教子女至于長女適俞邦用邦用亦早卒所親憐其貧勸之再適女曰我再嫁俞氏祭祀誰奉之且辱吾母寧餓死不改節乃歸與母同居守志有司上其事詔旌所居曰雙節之門


汪

曰天下惟節義易以感人然而節義所在母

不得而與諸子亦不得而奪諸其子蓋於俞淑安之

母子見之淑安以媵節自持期以自定已爾非期其
女之顧化也然而女卒化焉不辱其身卽不愧其母
女之節緣母而有感母之節因女而益光非是母無
以有是女非是女無以繼是母雙節之旌固知不以
加於匪人也






草市孫氏

國朝草市孫氏歛松明山汪永錫之妻也永錫家故貧傭人賣餅爲業娶孫氏頗甚莊居數年永錫病瘵及病革蒲伏據床語孫曰吾病久賴子以迄于今願天授嘉耦以荅子勞吾不能報子矣孫痛哭曰君卽不諱竊計必大事畢而後從君嗟乎君言貳妾矣九原不察寧詎能明其不貳耶妾寧蚤決以信君心無問後事永錫執孫手曰子言及此我無他腸子姑待我永錫兄永祥無賴人也宣言曰彼何能死卽病者死必嫁之孫遂飲藥先永錫十日死蓋嘉靖己丑冬十月上旬云

汪 曰永錫與南明公同里閩南明公稔知其婦
行慨弗得人以表之而惧其終於湮沒無聞也故著
七烈傳首稱載之以斬垂不朽此非以私其鄉人盖
亦節足紀焉夫富則相守貧則相離人情乎孫氏不
厭永錫之貧躬扶永錫之療一言自决先夫隕身寧
有所感奮矯強而然實其天性之貞純也貧而彰其
名於後南明公之力爲多





董涓妻


國朝海寧董涓妻虞氏少慧知書頗善吟咏年十六歸
董甫兩月而涓卒痛絕欲死以殉家衆防之遂不得死
父母惜其年少勸女再適女不應吟菊竹二詩以見意
其菊詩云移得春苗愛護周柴桑無主爲誰秋寒芳甘
抱枯枝萎羞墜西風逐水流井上竹詩云一片貞心古
井泉清寒徹骨自堪憐相看歲暮青青色歷盡冰霜戴
一天乃刻木爲夫像晨昏事之年五十餘卒人皆稱爲
節婦

節婦

汪

曰古有刻木爲親像者史策艷譚之婦之事


夫猶子之事親也夫沒而刻木爲夫像則自海寧虞氏始虞氏知書能詩其於殉夫之義講之熟矣夫死而不卽死者以防守之嚴而不得死也彼肯以芳香潔質清勁貞標逐水隨波而改節之不顧哉故以其志節之堅託之菊竹之咏菊竹並歷水霜操守愈厲而以斯自况足占其晚節馨香歲寒清徹益四十年如一日也詎獨諷誦二詩得其詞藻之工已乎夜明空青世所共寶有不美其才高其節者非情也



鄭嚙妻

列女傳卷十五

四十九



國朝鄭嚙歛長齡橋人妻汪氏汪自信行徙居長齡橋而汪天貴女歸鄭嚙居數月嚙客死廬州女聞而慟絕者三誓必死會姑病女飲泣事姑姑亡女求自盡家人日夕護之不得間嘉靖癸丑正月六日家人悉出觀燈女夙已紉襪衣自經死年二十耳君子謂鄭氏婦爲貞烈孟子云舍生而取義者也其鄭氏婦之謂乎


汪

曰太函氏謂長齡之死乃在笄年奇節也夫

旣無幸義不獨生設有子可依是宜無死而子未生矣有姑當事亦宜無死而姑旣亡矣苟活復奚待焉

生也不借死必履信燕爾新昏奄忽同盡寧甘溝瀆
名義賴以扶也懿厥哲婦心口相違夫肉未寒倏已
更嚮觀茲不有覲顏乎哉





張宋畢妻

張宋畢之妻邑人甄氏之女也甄配張三載其夫卒生一子甫五歲亦卒獨遺姑在子無一親甄事之稱孝竟孀守絕外念或有以難病之者甄作歌以自矢焉歌曰泉流不歸山雨落不上天妾心死不回金石無全堅白日經中街飄忽沉西海妾心日不如長夜瞳瞳光不改明月懸清輝三五二八圓又缺妾心月不如一圓耿耿無虧時妾心一寸鉄不與紅爐滅妾心萬鈞石不觸洪濤裂妾髮可剪妾頭可截妾心之白不可涅憶妾二十春結髮事良人焉知三載皇天傾羅幃帳幕生素塵懷

中五歲兒水上浮漚淪白髮蕭蕭垂老親綠衣零落空
悲辛吾聞陳孝婦夫死養姑心愈固朱幢入奏丹書來
黃金北斗高萬戶又聞杞梁妻一哭梁山傾精神變天
地黃土非無情君不見章臺女傾城華去年嫁東隣今
年歸西家顏色皎皎如桃花桃花貪結子紅顏不惜污
泥沙回首天漢上雙鳳縹縹凌紫霞蓬萊仰面空咨嗟
書罷大泣益勵其守而事奉其姑朝夕惟勤終身不愧
其所歌云君子謂甄氏達於辭詩云永言孝思孝思維
則此之謂也

汪 曰近有豔婦甚宜其夫情愛狎昵繾綣綢繆

若膠漆之不可別然無何而其夫病矣是婦具橐餽
供湯藥不頃刻離也日夕嗚咽若將夫亡與亡然無
何而其夫死矣是婦擗踊哭泣喪葬盡禮哀毀之不
勝若將畢大事而卽相從地下然俄而一陰陽家憫
其哭之慘也乘間與語謂碩人富於年未有子獨守
無爲某所有少年夫偶形貌昞麗實與碩人兩相當
碩人盍捨此而就彼何眷眷而受此孤栖爲然是婦
初弗應已徐言曰是善爲我謀第言之弗早妾心已
有所屬先是付月帖於人矣問誰之爲則所延療其
夫疾者也蓋醫者診其夫脉謂其疾之不治是婦識

其夫之弗起已懷貳心乃知其哀痛迫切之情期以飾人之耳目者悉屬矯假而非真也以斯較張宋畢之妻天壤絕矣愚重慨焉特舉以形張氏婦之貞烈





謝湯之妻

國朝歛謝湯病狂人也娶潛口汪柳浩女湯狂發囚首
跣足遇人輒哆口笑或摔而罵之女安湯舉一子矣其
後湯病狂愈甚湯父珩幽湯別室中女大以爲憂伺湯
衣食唯謹珩稍解乃寬湯會倭寇薄郡中走寧國鄉人
爭入黃山避寇過湯門湯踉蹌從衆人行旋出境迷失
道候人捕湯詣太平縣以爲倭也掠殺之無何子又死
珩察婦必死則遣季女與之同卧起母令自裁女祥以
其私告季女曰夫死子死我柰何復以死益之季女以
爲然防稍懈會門外水大至幾及河梁女鑰戶出門詭

季女觀水出門則授季女踰投水死時嘉靖丙辰正月十七日也

汪 曰達人以生爲寄以死爲歸故生順則死安理當死而求生雖生猶死耳謝湯之婦自湛以殉狂夫蔡人之妻弗得專美於前矣其視死如歸而以得死爲安乎死雖無以裨益夫亡無以順承舅志亦求自盡其心已爾壯夫礪節匪附青雲之士難望聲施後世倘斯婦也不遇太函鮮不以河梁爲溝瀆也已





東城棄女

棄女者姓萬氏名棄劉復立之妻鍾山公之幼女也生而秀朗通女孝經及女史列傳諸篇年甫十三歸復立舅姑咸稱其少而知禮逾四年而復立忽遭疾云逝棄時年十六未有翁嗣且里族原非仁俗或有異議者棄聞之泣曰我生自名家我父明經庠序嘗聞夫死不嫁二夫又聞忠臣不事二君烈女不更二夫但堂上二姑無託不卽死耳有子無子吾命也何計耶遂以共姜自矢竭孝事二姑暇則理諸經懺足不出戶家人雖五尺童子不及面焉一日鍾山公受書太學歸哀女之孀

居欲令其返母而思以溫慰之女竟不行雖女婢促之
數輩益堅拒焉其慎篤類如此君子難之詩曰我心匪
席不可卷也棄女之謂也

汪 曰萬氏可謂天性之貞純者矣年十三而嫁
宜無得於諳練之素也而以知禮稱年十六而寡非
有得於觀感之深也而以持節顯信哉不愧古之烈
女而爲今之共羨矣卽其操履豈與女史列傳向所
誦習者迥相殊哉君子愛人以德何以姑息而愛其
更醮也

